

## Osa 1/13: Kompiaispäivät

Matkailu ja turistit on olheet mulle tuttuja pienestä pittäin. Niinkö kaikile muilekki minun sukupolven äkäslompololaislapsile. Ja tieten myöhemillekki. Tosin sillon – 1950-luvula – ei taijjettu vielä puhua turistista. Kävijöitä sanothiin hihtajiksi tai viehraiksi. Äiji eli isänisä ja muu vanhempi polvi kuttuit niitä helsinkiläisiksi, vaikka kyllä väkeä siihen aikhaan kävi jo muualtaki Suomesta.

Meilä oli asunu hihtajia jo aiemin, mutta minun ensimäiset muistot ajottuvat 50-luvun lopule, meän uutheen talhoon, johon met muutima alkuvuesta 1959.

Meilä ruukas silloin käyä joka vuosi torniolaisia, eli niin met niitä kuttuima. Mie muistan ainaki **Kaarlelan** perhheen ja **Toratin Maijan**.

Mie ootin aina kovasti niitten tuloa, joka ajottu pääsiäisseen. Ootin etenki kompiaisia, joita net pruukasit tuua. Ja niitä saiki syyä säästelemättä. Ei ihme, että se makkeismäärä yhistettynä sen aikasseen hamphaittenhoithoon sai lopulta aikhaan kauhean hammassäryn.

Ja arvakkaapa, missä oli siihen aikhaan lähin hammaslääkäri. Tietenki Torniossa. Se tiesi nousua isän kansa aamuneljältä Niskalan authoon. Kotona olima sitte iltaseittämän jälkhin.

Avoinna: ma-la 8-21, su 10-21

Kompiaisten lisäksi mie ootin Kaarlelan perhheen suunilheen saman ikäsiä poikia, joitten kans pruukasimma leikkiä ulkona, ko net oli tulheet hihtamasta, saunonheet ja syöhneet.

Kävi meilä muitaki ko net torniolaiset, mie vain en muista niitä niin hyvin. Vissiin net ei tuohneet karamellia.

Se oli melkonen järjestely, ko valmistauvvuthiin hihtajien tulhoon. Pirtistä kannethiin huonekalut ulkovarasthoon. Niitten tilale tuothiin isän tekemiä pitkiä pöytiä ja penkkiä.

Talouskaappi nostethiin niin, että sen selkäpuoli oli pirthiin päin. Sen toisesta laijjasta veethiin vihreä verho pesukomeron nurkhaan. Niin saathiin keittiölle näkösuoja ja ennen kaikkea ittele nukkumapaikka. Sielä met sitte nukuima lautturissa koko siihen aikhaan nelihenkinen perhe, ko kamarit oli vuokrattu viehraile.

Myöhemin, ko meile mahtu linja-autolinen väkeä, äitile palkathiin avuksi apulainen tai kaksi. Net nukuit pitkien pöytien takana pirtin toisele seinäle sijotetussa levitettävässä sängyssä.

• Postin pakettiautomaatti • Kierrätyspiste • Sähköauton latauspiste •

